

15

\id 1CO

\h 1 Korintus

\c 15

\s Nuik: Klistus nglong go sogo nebut, Paulus lo pen go.

\r 1 Korintus 15:1-58

\p

\v 1 Dem-debui, blong duo yap! Motnang, genam lo nguok go, Deguo Teguop nogo, tandali se duing! Ngga, motnang lo dabui ba no mo iti-kenanga. Deguo teguop ngga, motnang go wali kutrui gemang.

\v 2 Deguo Teguop ngganemot lo, motnang suey so, susuoy sogo gabe pung.

No, motnang-a, Deguo Teguop ngganemot no, waysagi ey se mlak go susuing.

Ngga, genam lo, motnang no Deguo Teguop pen go kalik se!

No, ngga, motnang dabui lo sang kua keng mo, esang, Blong Dem Yesus, dabui ba no tebadali sang gemang mo iti.

\p

\v 3 Seni so, nebut nemu klaya seni go, motnang no genam lo mo pen. Genang tang go nogo, nebut ngge, Wali Sam Klaut ba no klik go kalik, mo pen dali: "Blong Dem, imot go kuklue tang so, mo kebong.

\v 4 Nemot, mu no mo tuet. No, ku nangglik tete no, tandali mo nglong", naklay Wali Sam Klaut no, pen go kalik.

\v 5 Ngga sik sogo, Nemot go saysuk, Kepas no mo taling. Nggano, nemot lo kuoy go andua 12 yam sogo nogo, gemang taling dali.

\v 6 Ngga ey, blong duo yap klay gono yaluim go 500 blo nogo ey, gemang tegu.

Seni so, sedue kabung ngga sik sogo temu, nggeasui go maning gemang. Yang, klay-klay sang mo kebong.

\v 7 Ngga blo idi logo, Yakobus-dem nogo, Nemot go saysuk gemang taling-nangam. Ngga sik sogo, Nemot lo kuoy go tamot-tamot naklay nogo mo taling dali.

\v 8 Nggano, i go seni sogo, genam no Nemot go saysuk gabe taling. Genam, Nemot ey tegu go ngga, nemu kua blup seni!

\v 9 Seni so, tamot-tamot naklay sik sogo, genam ngge sui kua. Ki Wali Iram go blung truik nogo, genam lo iseng mo taling. Genam tamot dali, no tamot temu ey kua kerlam. Genam seguay!

\v 10 Ki Wali Iram go klum tang sogo so, genam ngge kalik so gabe. Genam no iti go klum ngganemot, seni kua go, kua! No, seni so, wali kebal genam logo, kangok so mo usey, tamot temu ey kua kerlam. Ngga, genam tang sogo so kua, no, Ki Wali Iram go taiti-klum logo so.

\v 11 Nemot-a, genam logo, tamot temu logo Deguo Teguop nguok klong go, ngga kerlam.

Ngga tang sogo so, motnang, Woy Dem nogo dabui iti go gabe mo keng.

\s Nuik: Klistus nglong go tang so, imot mea nglong.

\r 1 Korintus 15:12-34

\v 12 Yang, nago no, mo pepen go: "Blong Dem, seni so, sedue kebong go sik sogo mo nglong!", sogo kalik so, motnang temu lo ne pu: "Sedue kabung kebong go ya kua nglong!"

\v 13 Genam lo duing go: sedue kabung kebong go ya kua nglong go, Blong Dem gabe kua nglong dali.

v 14 Blong Dem seni so kua nglong go kalik go, genamnang lo Deguo Teguop pepen klong go ngge, nemot go seni kua gemang. Nggano motnang lo dabui iti go, Nemot no kekeng go ngga, seni kua dali.

\v 15 Atnang lo pen go: "Ki Wali Iram lo, Blong Dem tandali mo nglong!" No, sedue kabung kebong go ya kua nglong go, ngga seni so mo go, genamnang lo, wamoy mlue so, Ki Wali Iram go sui ba no gabe pepen. Nemot-a, Nemot lo ngga kalik go, kua semu go!"

\v 16 Sedue kabung kebong go, seni so ya kua nglong go, Blong Dem Ki Wali Iram logo, sang kua nglong dali gabe.

\v 17 Blong Dem tandali kua nglong go, motnang Nemot no dabui lo keng go, seni kua. Nggano, motnang, kon tegan lo mo dok-sing.

\v 18 Nggano, Blong Dem ey kebong go sedue kabung, susuoy so wali nogo ya kua pung!

\v 19 Imotnang, nggeasui go wali seguong nogo so Blong Dem no keng go, imot go wali ngge, nemot go seni ulue so, sedue kabung temu go wali ey kua kerlam.

\p

\v 20 Yang, seni sogo ngge kalik gabe: Blong Dem, kuduong so, banim seni, kebong sik sogo, tandali mo nglong.

\v 21 Seni so, kebong, sedue klaya duo sik so, degut go, ngga kalik dali so, sedue kabung nglong genang sogo, Sedue klaya duo dali tang sogo so, gabe mo pung.

\v 22 Yang, seni so, Adam-dem tang so, si-kabung nogo kebong mo pung. Ngga kalik dali so, Blong Dem logo tang so, si-kabung naklay tandali mea wali.

\v 23 No, sedue kabung, klay-klay, nemot go da-nemot go da so, mea nglong. Yangga, kuduong so banim seni so go: Blong Dem! Nggano, Blong Dem, blong ba lo tandali weng go ku nogo, Nemot lo mo kuoy go sedue kabung mea nglong.

\v 24 Ngga blo idi lo, ku yam sogo mea pung! Nggano, ut-nan ta so mlak go don naklay, Nemot lo pedueng gono, Blong Dem lo Wali Tap-Duding suey so mea ip. Nggano Ki Wali Iram, imot go Wali Aya go ta no, mea iti.

\v 25 Seni so, Blong Dem, Iram kangok goso lemoy genang, e ... kukunan blo sogo don Ki Wali Iram lo, Blong Dem go masi ba no mea seguoy go ta-sing.

\ v 26 Nggano, i go seni sogo plesi ngga, sikebong go don gemang ya pedueng.

\v 27 Ngga naklay, Wali Sam klaut ba no, ngge kalik mo pu: "Naklay-naklay Ki Wali Iram lo, Blong Dem go masi ba no, seguoy go mo ta-sing!"

Ngga sik so, gabe senong: Seni so, "naklay-naklay" pu go ngga, Ki Wali Iram tang goso, kua pu gemang!

Seni so, Blong Dem tang so logo "don naklay" Ki Wali Iram go ta sono mea iti.

\v 28 Yang, naklay-naklay, Blong Dem go masi ba no, seguoy go mo ta.

Naklay Ki Wali Iram lo mlak gono, Danon tang go weng go, Nglangin go masi ba no mea unuik dali.

Ngga kalik mea lemoy: Ki Wali Iram, Senang Wali Mani Iram gemang!

\v 29 (Ngga kalik senong go,) motnang tandali se duing!

Sedue kabung kebong go, ya kua nglong go sogo, sogo nang so, motnang sik sogo sedue kabung temu lo, sedue kabung kebong go, nglong dali genang sogo, bu ne tutui?

Nemotnang tandali ya kua nglong genang sogo, bu tui go ngga nemot go seni kua gemang.

\v 30 Nggano, genamnang tang go, sogo nang so, ku no-woy no, koy wong ba logo ne koklong?

31 Dem-debui, blong duo yap! Blong Dem Yesus ba nogo tang so, genam dabui yakay ey, motnang nogo dabui ta gabe tetegue! Ngganemot sogo so, motnang se tup:

"Ku no-ku no, genam sikebong ey gabe kekelasok."

\v 32 Yakena Epesus no, (sedue idekeba ey go kalik,) menay iseng ey go ey, genam wali genang sogo so, sagui mo tui. Nemot go seni kua, genam tandali yua kua nglong go. Ngga kalik go, nuey-a: imot weng go, nggeasui go ten-a, bu-a ya drop go, utep, imot kebong dali genang

\v 33 Motnang tap kua nega! Sedue piam go ey, ta kekeduik go, mot go wali suey go, mea waluk dali.

\v 34 Tandali suey so duing! Nggano, piam kua semu dali! Motnang ey go sedue kabung, Ki Wali Iram maning kua senong go gemang. Esang! Motnang suongsut se tra!

\s Nuik: Saysuk ngge, tandali mea wali.

\r 1 Korintus 15:35-58

\p

\v 35 Sedue kabung meno, (blong duo yap sik sogo) lo, ngge kalik go usi go:

"Sedue kabung kebong go, sogo kalik so ya nglong?"

Nggano: "Sogo kalik go suk so, nemotnang tandali go ya pung?"

\v 36 Esang, motnang lo, ngga kalik usi go, puplu so gemang. Mot yatrang ngge se ikum: Di-don, mot lo bluim go, banim kebong go, nan ba no kualo go, ngga sik so tip inim-a mea pung.

\v 37 Nggano, mot lo di-don meno bluim go, yen nok-nang kalik so, suk ngga kualo go sik so tip inim-a way so mea pung, banim go suk ey kua kerlam go.

\v 38 No, Ki Wali Iram lo, duduing go kalik, di-don nogo, suk meno-a gabe iti.

Seni so, Nemot lo di-don nogo, nemot go suk klay-klay, banom so gabe iti.

\v 39 Seni so, saysuk ngge go kedong, kua kerlam.
Sedue kabung go, wi-dasi kutui logo, bu ba logo, blong banom seni gabe.

\v 40 Yang, kukunan sogo saysuk, ut sogo saysuk, blong gemang dali.
No, blong kua kerlam.

\v 41 Woy kalik, nemot go blong banu ey kua kerlam. Nggano banu go blong ut top go blong ey kua kerlam dali, nggano, ut top meno-meno go blong ey kua kerlam gemang.

\p

\v 42 Sedue kabung kebong go, nglong genang sogo, ngga kalik dali gemang.
Saysuk kebong go, bluim go kalik so, suk nan no tuet go, seni nogo suk inim-a tandali go mea iti go pung. Nemot go blong senang so mea suing, ya kua nega.

\v 43 Yang! Piam go-a kuali go, blong ey go-a way so mea nglong.
Don kua go-a kuali go, don kangok go-a way so mea wali.

\v 44 Seni so, nan ba no kuali go ngge, kukunan saysuk gabe.
No, tandali nglong genang sogo ngga, blong-saysuk gemang.
Yang! Kukunan saysuk gabe go, blong-saysuk gemang dali!

\v 45 Wali Sam Klaut ba no klik go kalik:

\q Kuduong so semu go sedue, ngga Adam, nebuem nebit ey goso gemang lemoy.
I go sogo "Adam" ngge, (Woy Dem), blong, senang wali-wime so iti go gabe pung.

\p

\v 46 Yang! Blong ey go, senang wali-wime banim no kua pung go,
no, kukunan sik sogo-a, banim gabe lemoy.
Ngga blo idi lo, blong ey go, senang wali-wime gabe weng.

\v 47 Kuduong sogo, ngga Adam, nan sik so saysuk mo semu-ngam.
No, namon tete sogo, (ngge Woy Dem Yesus,) wali yakena sik sogo.

\v 48 Yang, kukunan sik sogo suk ngge, kuduong sogo ey gabe kerlam.
No, Wali suk ngge, Namon tete sogo ey gabe kerlam.

\v 49 Imotnang, kukunan sik sogo saysuk-a nggeasui go gabe kok.
Ngga kalik dali so, blong ey go suk-a mea kok-eyon dali.

\v 50 Dem-debui, blong duo yap! Genam lo, motnang nogo ngge kalik gabe pen:
Kin, kedong ey go tang go, Ki Wali Iram go tap-duduing ba nogo ya kua degut.
Buin genang sogo logo, senang wali wime ya kua iti.

\v 51 Nebut tebot, seni ey kok go gigit go, genam lo, motnang no gabe pepen:
Imotnang, temu kebong go, no, temu maning kua kebong go, naklay saysuk-a mea iwot-sing.

\v 52 Seni so, nemu klaya go woy no, da klaya, i go sogo yasu plaway tuot go,
imotnang go saysuk ngge mea iwot. Yasu plaway ngga tuot go nogo, sedue kabung mo kebong go ya kua buin go saysuk ey, tandali mea nglong.
Imot naklay go saysuk ngge, mea iwot-lak dali.

\v 53 Yang, saysuk, buin genang sogo ngge, ya kua buin go-a way so se kok,
kebong genang sogo, ya kua kebong go-a way so se kok dali.

\v 54 Buin genang sogo ngge, ya kua buin go-a way so kok gono,
kebong genang sogo ngge, ya kua kebong go-a way so kok gono,
Wali Sam Klaut ba no klik go ngge mea lemoy:

\q "Sikebong go don mo seguoy, nggano don mo kua!"

\v 55 "Sikebong, mot go don, nago yam so? Mot go wasrang sesat, nago so?"

56 Seni so, Sikebong go don ngga, kon-keba mling.
Nggano, kon keba-mling go don ngga Demu Trui sik so gemang iti.

\v 57 Yang! Imotnang, Ki Wali Iram no taiti suey se pupu!
Nemot logo tang so, Woy Dem Yesus Klistus ba lo, imot don ey ip genang, mo iti.

\p

\v 58 Dem-debui, blong duo yap! Ngganemot sogo so, tutuing kua tra goso,
dabui don ey iti go, ip go se susuing-lak!

Woy Dem logo wali keba-a, ku no-woy no se pupluok.

Seni so, motnang se senong: "Woy Dem ey klay gono, ta keduik go,
mot go seguot pupung go, seni kua go, kua!"